

Asisinong

1 Aino luai God kata asinong na mete kuku na kuli rina. **2** Katapo kovek luai ta bil e kuli rina. Keve bil aongos kitapo kovek i pukun. Vong lava katapo pakut a keve bil aongos. Malanganto i God katapo ngoi angpok palau e kuli laman.

3 Au na God kala antok, “Malangas, ku tu aserei.” Na kala malangas. **4** Na God kala arai ta malangas vola roron na kala posong ang taliungai ani malangas pelek a vong. **5** Na God kala atuk a malangas ang ta tenei ias, na kala atuk a vong ang ta tenei vong. Au, vong kala serei le na kala tenei vaik pok. Asukang na ainoai i taun kala pasal suai.

6-7 Au na God kala antok, “Laman, ku tapagal ane si pongua na palpal. Mang palpal ane pangkul na mang palpal ane kevkev. Nei liuan i ngono palpal ke, ka atogon ta pangau si pagal ani ngono laman ke.” Au na kala asukang. **8** Na God kala atuk a pangau ang ta metekuku. Au, vong kala serei le na kala tenei vaik pok. Asukang na vapongua i taun kala pasal suai.

9 Au, na God kala antok, “Laman ang e kevkev i mete kuku, ku ago kuvul si sikei a oring na numai kuli roe, ku tu aserei.” Na kala asukang. **10** Na God kala atuk a laman po ago kuvul ang ta nei laman, na kala atuk a ring kolo ang ta kuli roe. God kala arai ania ta vola roron.

11 Na God kala antok, “Kuli roe, ku apolokai ani mamain ta sukal atogon katui na mamain ta ei atogon uai na katui neiria ani ki uai asereai ani manik iria akorong ta matan uai.” Na kala asukang. **12** Ri sukal angpetpetekai na ri ei angpetpetekai kila polok kuli roe. Kita uai asereai akorong ani kari keve mamain ta uai. Keve katui iria kita apolokai akorong pok ani keve tukulai iria. Na God kala arai ania ta vola roron. **13** Au, vong kala serei le na kala tenei vaik pok. Asukang na vapotol i taun kala pasal suai.

14 Au na God kala antok, “Keve malangas, mi tu aserei e metekuku ani mi akalit ta angpetpetekai i tenei ias ve tenei vong. Keve malangas ke kapa ki akanangai ani angpetpetekai i keve taun na keve ulen na keve matas. **15** Ani keve malangas ke e metekuku ki mang amalangasai ani kuli rina aongos.” Na kala asukang. **16** God kata asinong a pongua na malangas lava. Ri makarap ve ulen. Makarap vo tavirimok ang, ani nia ka saupai ani tenei ias, na ulen ani ka saupai ani tenei vong. Kata asinong kapa ri kalto. **17** God kata asinong a keve malangas ang asi mang ani kuli rina, **18** ani ki saupai ani tenei ias na tenei vong, na ki pagal apetekai ani malangas na vong. Na God kala arai ania ta vola roron. **19** Au, vong kala serei le na kala tenei vaik pok. Asukang na vapuat i taun kala pasal suai.

20 Au na God kala antok, “Nei laman ka duk ta mamain ta manmanik to. Na ri mani, mi ngoi angpok neite kuku e pangkul i kuli roe.” 21 Asukang na God kala asinong ri ielava kuvul ve mamain ta manmanik aongos kipo to na kipo duk na kipo sang angpok nei laman val kari keve laulauan angpetpetekai. Na ani ri mani vap po ngoi korong ang, asukang palau val kari keve laulauan angpetpetekai. Na God kala arai ania ta vola roron. 22 Na God kala poso atauia iria ta mengen asukang ke, “Mi apitus na mi serei aduk si kami tataot ani nei laman ka duk tatami. Ri mani, mi kun apolokai pok animi ani mi duk si kuli rina ke.” 23 Au, vong kala serei le na kala tenei vaik pok. Asukang na va palpalima i taun kala pasal suai.

24 Au na God kala antok, “Ri manmanik anglok i kuli roe, mi serei aduk e kuli rina, na mi apitus asereai pok animi si kami keve kuvkuvulan angpetpetekai. Ri vongo asi aiveven, ri manmanik palis e kuli roe na ri kei i nei uten, mi apitus angkokoai singimi pok.” Na kala asukang.

25 God kata asinong a ri kei, ri vongo asi aiveven e rina na ri manmanik po palis e kuli roe. Kata asereai aniria ani ki apolokai pok aniria akorong. Na God kala arai ta vola roron.

26 Au na God kala antok, “Tara asinong a ri vap si lilinau na kankanuai ira. Tara alis iria ta kitmat si saupai aongos ani mamain ta ien i nei laman na mamain ta mani i nei pangau. Ki saupai kapa ani mamain ta vongo ipo aiveven na ani kuli rina

aongos ke na ki saupai kapa ani mamain ta manmanik kipo palis na pasal anglok kuli rina.” 27 Asukang vanang na God kata asinong ri vap si kankanuai ina akorong pok. Io, si kankanuai ina pok God kata asinong ri vap. Kata asinong ri vap ani ki tauan na aina. 28 Na God kala poso atauia iria ta mengen asukang ke, “Mi apolokai pok animi. Kami inatus ki duk e kuli rina na ki saupai ania. Mi saupai aongos ani ri ien nei laman na ri mani nei pangau na ri manmanik aongos kipo ago kuli roe.”

29 Na God kala antok, “Nalapo alis vang imi ta ri sukal aongos i kuli rina vopo atogon katui kuvul ve ri ei aongos vopo uai ang. Kilapo kakami ani mi angan singiria. 30 Na ani ri mani i nei pangau na ri manmanik aongos kipo to kuli vunep, riria kapa ki angan pan na uai i mamain ta ei na uriuri aongos.” Na kala asukang. 31 God kala arai ani keve bil aongos i kana la asinong ang, na vola roron luai. Au, vong kala serei le na kala tenei vaik pok. Asukang na va limalesikei i taun kala pasal suai.

2 Au na God kala akamusai ani asisinong ani metekuku na kuli rina tavirimok asip ke. 2 Kata akamusai aongos ani kana keve avibisan i asisinong si va limalesikei i taun. Au na si va limalengua i taun kala ausai pelek kana abis. 3 Kata poso atauia na taun ang na kala vil agogoai ania. Kata abis ia

asukang using si taun ang akorong kata ausai pelek kana avibisan aongos i asisinong.

God Kata Asinong Ri Vap

4 Kana na akusku i sa kata serei si taun ang na God kata asinong na mete kuku na kuli rina. Si taun ang a God, nang nia na IAVE, kata asinong a kuli rina na mete kuku, 5 katapo kovek i mangsikei a bil i suk polok le kuli vunep, using IAVE parik katapa alis langit lak kuli rina na katapo kovek lak i igenen si itoitonai ani nei roe. 6 Sikei laman katapo uli uv alak le nei roe na kapo vil avuluk na kuli roe aongos. 7 Na IAVE kala kap roe le kuli vunep na kala pitopito na igenen tatana. Le na kala kui alak kana malu i to ane si isuna i igenen ang na kala serei a igenen to.

8 Aino le, IAVE katala sukal a mangsikei a matang e Eden, si palpai ipo sanglak ta makarap. Na eiang vanang kala asinong a igenen i kana la pitopito ang. 9 E nei matang ang IAVE kala asereai ani mamain ta ei anglok pulakai aongos. Na kipo keve ei talupus roron luai angkokoai si angan. E nei liuan i matang ang kala asereai ani pongua na ei. Ei i to na ei i malangas ani rikek na roron. 10 Katapo atogon a mangsikei a sung katapo saling le Eden na katapo alis laman ani matang ang. Si mang palpai i Eden, sung ang kanlapo tapagal ane si puat a ngakan i laman. 11-12 Ainoai i sung, kana asan ta Pison. Laman

ke kapo saling pulakai nei palpal Avila aongos. Na palpal rina ang kapo duk ta gol roron luai. Eiang kapa kapo atogon rul sain ro na iat roron lik ke onikis. ¹³ Vapongua i sung, kana asan ta Gion, na kapo saling pulakai nei palpal Kus aongos. ¹⁴ Na vapotol i sung kana asan ta Tigris na kapo saling e ngising i palpal Asur, si palpal ipo sanglak ta makarap. Au na vapuat i sung kana asan ta Euperetes. ¹⁵ IAVE kata asinong a igenen ang e nei matang e Eden ani ka itoitonai ania na ka aiveven ia. ¹⁶ Na kala pini ia asukang ke, “Kupo kalakala luai si angan si uai i keve ei aongos i nei matang ke, ¹⁷ sikei napo tubat ua ta ku ago ta angan si ei i malangas ani roron na rikek suke. Napo tubat luai anim, using man ku angan singina, matmat ka kinkos ua.”

¹⁸ Na God IAVE kala antok ta, “Pua, parik kapa ro ani tauan ke ka ago papalik. Kapo ro ani naka asinong ta mang anu val nia ani ka papakangai ania. ¹⁹ Aino le, IAVE kata pitopito na mamain ta manmanik na ri mani ta roe. Na kala songo iria ane si igenen ang ani kame poso asan aniria. IAVE katapo ago na kapo longong ta saka asan an a tauan ke ka atuk a siksikei i keve manmanik na mani ang tatana. Nang nia kata lapo kana asan luai. ²⁰ Asukang vanang a tauan ke kata atuk a ri manmanik aongos ipo aiveven na i nei uten na ri mani aongos i nei pangau na kuli roe ta kari keve

asan. Sikei katapo kovek i sikei ka ago kuvul ve nia asukang val kana papakangai. ²¹ Asukang na IAVE kala arodot ia ani ka rot mat. Taun kalapo rot, IAVE kala luk suai ani sikei a vuk tuan i vagvag ina na kala pakut pok a makas ang ta sin. ²² Au na ka luk a tuan ang na kala pitopito asereai ani aina tatana. Kala songo le na aina ang na kanla atatung ia si kana tauan. ²³ Si vuk taun ang kala arai ani kana aina na kala antok ta, “Pua, kana vang a mangsikei ig akorong! Tuan ina, le si tuan ig. Sin i pukunina, le si sin i pukunig. Io, naka atuk vang kana asan ta aina, using kata serei le si tauan.” ²⁴ Tukulai ina na tauan ka papelek a tamana ve rinana na kan ago kuvul ve kana aina na kilong sikei palau. ²⁵ Si taun ang a ngono angkisnganan ke kilongtapo pukun varas na parik katapa atogon oring si vil amamaila anirilong singina.

Longogel

3 Nei liuan i keve manmanik aongos i nei uten ang IAVE katala asinong iria, kene katapo nas alava luai aniria. Mangsikei a taun, kene kata tapasuk na kamela antok a aina ang asukang ke, “Au si kapo tutuman nang ta God kata tubat akorong imilong asi ago ta angan si mamain ta ei aongos nei matang ke?” ²⁻³ Aina ang kala antok ta, “Namemlongpo kalakala si angan si ri ei aongos i nei matang ke. Sikei si

ei ang e nei liuan i nei matang ke akorong, God kata tubat imemlong asi ago ta angan an singina. Kata atatai imemlong ta man namemlong angan vo sigil si ei ang, nganlak namemlong mat.”
 4 Na kene kala antok a aina ang ta, “Apua! Parik nang milongpa angkoai si mat. 5 Arai, God kata mengen asukang nang using kapo malangas ta man milongla angan si ei ang, milongla atogon a nas lava. Milongla serei asukang palau val nia, God akorong. Milongla nas vang a ro na rikek.”
 6 Au, aina ke kala longong na kala arai ta uai ina i ei ke kapo ararai aro na kapo roron asi angan, na man nganing kala angan singina, kala atogon a malangas roron luai. Asukang na kanla ngumut a mang matan uai ina na kala angan. Kisngana kapa katapo tung eiang. Au na aina ang kala alis ia na kala kun angan kapa. 7 Na kilongla lomlomon tapalas na kilongla arai kinle ta kilongpo pukun varas. Asukang na kilongla kikit pan i ei na kilongla susukai ania asi karilong kavat anirilong. 8 Au kalapo livus aliu tenei ngelik na kilongla longong a God IAVE sipo pasal aliu e nei matang ang. Na kilongla sip sian mumun ania nei liuan i ri ei i nei matang ang. 9 Sikei IAVE kala songo na tauan ang ta, “Nei numai kana evoi?”
 10 Na tauan ang kala antok, “Nata longong ua sipo pasal pulakai na nala mumun anim. Natapo leng nang using nalapo

pukun varas.” 11 “Iau? Au si kata antok ua ta kupo pukun varas? Sa, kutala angan si ei ang nata tubat imilong singina?” 12 Na tauan ang kala antok ta, “Nang a aina ke kuta atatung ia singig, ninia vanang kata luk le na mang matan uai si ei ang na kanla alis iau, na nala kun angan.” 13 Au na God IAVE kala antok a aina ang ta, “Ku antok tapai anig. Sa akorong kupo abis ia asukang ke?” Na aina kala antok ta, “Nang a kene ang, kata kun kapau anig na nala angan.” 14 Asukang na God IAVE kala antok a kene ang ta, “Le si sa kutala abis ia, kam vilvil akui ka asukang ke. Numai papalik, ri vap ki alele na ki mirik anim, nei liuan i mamain ta manmanik. Tutapongai le kana ku palis ta vingam na ku kon mutep i kuli roe ani keve taun aongos tung si ku mat. 15 Naka amatung a neikien nei liuan imilong ve aina suke na milong uli angmamaralai angpokpokai animilong. Keve matan tivum ki angmamaralai ve keve matan tivuna i aina suke. Taun kapo tulbonai anim ka komeng a patum, na numai ku kalat a pung i kakina.” 16 Au IAVE kala mengen a aina asukang ke, “Kam vilvil akui ka asukang ke. Taun kupo sungsungukan na kalapo sinong kam taun asi ingus, ku nasai ani kui lava. Na ku atogon a vubuk ani kam tauan, na ninia ka uli sausaupai anim.” 17 Na kala tutalang a tauan na kala posong ta, “Numai vanang, kutala

3:17

longolongai ani kalingana i kam aina, na kula kun angan si ei i kag tubat ang anim, na kuta longogel iau. Asukang vanang na kuli roe ke kala rikek tukulai ina singim. Na ka uli asukang tung si ku mat. Ka meng ua na kui i abis si keve taun asi kam sabonai ani pok singina. ¹⁸ Ka duk ta uriuri na ei ve angus rodotan, na ku sili pulakai nei uten lava si gule ta kam pok asi angan. ¹⁹ Ku kun gese alava vang taun a nei roe asi apolokai ta kam pok akorong. Ku abis alava tung si kuan mat na ku papok ane nei roe. Lomon akit ia ta kuta serei nang le si roe, na numai nang kupo roe. Au na using kapo asukang, taun ku mat kuan papok ane si ring ang kuta serei le singina.” ²⁰ Na tauan ang kala atuk a kisngana ta Eva. Using ninia vanang nganlak ka rinaria i ri vap aongos. ²¹ Na God IAVE kala luk a kulit i manmanik na kala kavat na ri Adam ve Eva tatana.

²² Na kala antok ta, “Igenen ke kalapo serei val tara. Kalapo nas vang a roron ve rikek. Asukang na ka ago ta angan an si ei i to ang vei nganing kala to asikei luai.” ²³ Asukang na God IAVE kala asok suai ania le nei matang ang ani kan abis matang akorong ania si roe ang nang kata serei singina. ²⁴ Au kala kirikai suai ani igenen ang na kala atung a Kerubim e mete takaman i Matang i Eden si palpal ipo sanglak ta makarap. Na kala atung kapa na mangsikei a

samele lava ipo visvis. Samele ang katapo ripag na kapo timis angtaliungai val ureurek i kut na kapo tavulit angpok asi tubat ani selen alak ane si ei i to.